

〔豐後國風土記〕豐後國者與豐前國合爲一國昔者纏向日代宮御宇大足彥天皇景詔豐國直等之祖菟名手遣治豐國往到豐前國仲津郡中臣村于時日晚僑宿明日味爽忽有白鳥從北飛來翔集此村菟名手卽勸僕者遣看其鳥鳥化爲餅片時之間更化芋草數千許株花葉冬榮菟名手見之爲異歡喜云化生之芋未曾有見實至德之感乾坤之瑞旣而參上朝庭舉狀奏聞天皇於茲歡喜之有卽勅菟名手云天之瑞物地之豐草汝之治國可謂豐國重賜姓曰豐國直因曰豐國

以地名爲姓

〔新撰姓氏錄右京皇別〕廬原公

笠朝臣同祖稚武彥命之後也孫吉備建彥命景行天皇御世被遣東方伐毛人及凶鬼人到于阿部廬原國復命之日以廬原國給之

〔續日本紀光仁三十六〕天應元年七月癸酉右京人正六位上栗原勝子公言子公等之先祖伊賀都臣是中

臣遠祖天御中主命二十世之孫意美佐夜麻之子也伊賀都臣神功皇后御世使於百濟便娶彼土女生一男名日本大臣大臣遙尋本系歸於聖朝時賜美濃國不破郡栗原地以居焉厥後因居命氏遂負栗原勝姓伏乞蒙賜中臣栗原連於是子公等男女十八人依請改賜之

〔新撰姓氏錄河內國諸蕃〕茨田勝

吳國王孫皓之後意富加牟枳君之後也仁德天皇御世賜居地於茨田邑因爲茨田勝

〔新撰姓氏錄和泉國皇別〕坂本朝臣

紀朝臣同祖建內宿禰男紀角宿禰之後也男白城宿禰三世孫建日臣因居賜姓坂本臣日本紀合

〔新撰姓氏錄右京皇別〕阿保朝臣

垂仁天皇皇子息速別命之後也息速別命幼弱之時天皇爲皇子築宮室於伊賀國阿保村以爲封邑子孫因家之焉允恭天皇御代以居地名賜阿保君姓廢帝仁淳天平寶字八年改公賜朝臣姓續日本紀合